



DECRETO .../2018, do ... de ..., polo que se crea e regula a Comisión interdepartamental de coordinación para a prevención e atención das condutas suicidas.

A Organización Mundial da Saúde (OMS) considera o suicidio como unha das cuestións prioritarias e compromete ós estados membros a traballar en prol da meta mundial de reducir para o 2020 nun 10% a taxa de suicidio. Este mesmo organismo tamén recoñece a prevención do suicidio como unha prioridade de saúde pública, destacando que o suicidio é a segunda causa de defunción entre as persoas de 15 a 29 anos.

Galicia tivo historicamente un alto índice de suicidios. A taxa de suicidio galega supera a media en España. Mentres que España rexistrou no 2016 unha media de 7,46 suicidios por 100.000 habitantes, en Galicia rexistráronse 11,08. En números absolutos, Galicia, con aproximadamente o 6% da poboación estatal, achega o 9,5% das mortes por esta causa, o que é unha mostra da súa importancia como problema de saúde pública de primeiro orde.

O suicidio é un problema da sociedade no seu conxunto, de xeito que para que unha estratexia nunha poboación resulte eficaz é preciso unha resposta multisectorial e integral. É dicir, para comprender o suicidio é necesario partir dunha percepción global do problema, de xeito que cómpre agrupar o coñecemento e a experiencia dos distintos axentes implicados no mesmo.

O Plan de Prevención do Suicidio en Galicia, elaborado no ano 2017, nace cun dobre obxectivo, o de reducir a taxa de suicidio e o de establecer medidas para diminuír o sufrimento das persoas que presentan un intento de suicidio, e das súas familias. Este plan establece un compromiso claro do goberno galego en relación ao problema do suicidio, a prol dunha resposta integral das institucións para a súa prevención. Con este plan quérese priorizar a prevención do suicidio na axenda da atención á saúde mental e concienciar acerca do suicidio como un problema global, e que vai máis alá da atención no ámbito sanitario, sendo necesario implementar outras medidas complementarias en ámbitos como o educativo e o social.

Entre as liñas estratéxicas que recolle o plan, figura a relativa á coordinación interinstitucional ante a conduta suicida, que coma xa se apuntou arriba, require para a súa correcta abordaxe a atención desde diversos ámbitos: sanitario, social e educativo, entre outros. Polo tanto, é necesaria unha correcta colaboración e coordinación entre as distintas institucións implicadas, e con esta finalidade, o Plan prevé a creación dunha Comisión interdepartamental de coordinación para a prevención e atención das condutas suicidas.

A Comisión interdepartamental citada terá a facultade de realizar a avaliación dos resultados das medidas implementadas durante o seu desenvolvemento, actualizar o coñecemento e promover novas actuacións baixo criterios de eficiencia e efectividade.

O decreto conta con dez artigos relativos o seu obxecto e adscrición, natureza e réxime xurídico, funcións da comisión interdepartamental, así como a regulación da súa composición no relativo aos membros, as concretas funcións asignadas á presidencia, vicepresidencia, secretaría e vogalías, funcionamento da comisión, duración do cargo e causas de cesamento. O decreto complétase cunha disposición adicional alusiva a ausencia da necesidade de consignación orzamentaria, e dúas disposicións derradeiras relativas, respectivamente, ao seu desenvolvemento normativo e entrada en vigor.

O presente decreto tramitouse de conformidade co disposto na Lei 39/2015, do 1 de outubro, do procedemento administrativo común das Administracións públicas, e na Lei 16/2010, do 17 de decembro, de organización e funcionamento da Administración xeral e do sector público autonómico de Galicia, sendo obxecto de publicación no Portal de transparencia e goberno aberto da Xunta de Galicia e sometido a audiencia dos grupos e sectores con dereitos e intereses lexítimos na materia. Así mesmo, foi sometido a informe económico-financeiro da consellería competente en materia de facenda, informe sobre impacto de xénero e informe da Asesoría Xurídica Xeral.

Finalmente, no exercicio desta potestade regulamentaria, e en aras da mellora da calidade normativa, esta Administración actuou de conformidade co recollido no artigo 37.1 da Lei 14/2013, de 26 de decembro, de racionalización do sector público autonómico, no que atinxe aos principios de necesidade, proporcionalidade, seguridade xurídica, transparencia, accesibilidade, simplicidade e eficacia; así como tamén os principios de boa regulación recollidos no artigo 129 da Lei 39/2015 de 1 de outubro, do procedemento administrativo común das Administracións Públicas, nomeadamente os de necesidade, eficacia, proporcionalidade, seguridade xurídica, transparencia, e eficiencia:

Na súa virtude, por proposta do conselleiro de Sanidade, no exercicio da facultade outorgada polo artigo 34.5 da Lei 1/1983, do 22 de febreiro, de normas reguladoras da Xunta e da súa Presidencia, e logo de deliberación do Consello da Xunta de Galicia na súa reunión do día ... de ... de dous mil dezaioito,

DISPOÑO:

Artigo 1. Obxecto e adscrición

1. Este decreto ten por obxecto a creación e regulación da Comisión interdepartamental de coordinación para a prevención e atención das condutas suicidas (en adiante, a comisión interdepartamental).

2. A comisión interdepartamental, que depende da consellería competente en materia de Sanidade, estará adscrita á dirección xeral competente en materia de asistencia sanitaria do Servizo Galego de Saúde.

Artigo 2. Natureza e réxime xurídico

1. A comisión interdepartamental é un órgano colexiado de carácter consultivo, de estudo, coordinación, seguimento e asesoramento en materia de prevención e atención das condutas suicidas en Galicia.

2. En todo o non regulado neste decreto será de aplicación o establecido para os órganos colexiados na Lei 40/2015, do 1 de outubro, de réxime xurídico do sector público, na Lei 16/2010, do 17 de decembro, de organización e funcionamento da Administración xeral e do sector público autonómico de Galicia e, no seu regulamento interno de funcionamento.

Artigo 3. *Funcións*

A comisión interdepartamental terá as seguintes funcións:

- a) O seguimento da implantación do Plan de Prevención do Suicidio en Galicia.
- b) A formulación dunha proposta anual ante as respectivas institucións das medidas a levar a cabo en relación coa prevención e actuación ante as condutas suicidas.
- c) A supervisión da evolución das medidas, actuacións e compromisos que se establecen no Plan de Prevención do Suicidio en Galicia.
- d) Ser informado das medidas estratéxicas do plan e dos seus respectivos indicadores, así como do cumprimento e revisión periódica dos protocolos e as accións de coordinación desenvolvidas para a prevención e actuación ante condutas suicidas.
- e) A emisión de informes anuais que inclúan datos dispoñibles referidos a condutas suicidas, actividades levadas a cabo, información de seguimento e avaliación do plan.

Artigo 4. *Composición*

1. A comisión interdepartamental estará composta por unha presidencia, unha vicepresidencia e doce vogalías, nomeadas e cesadas pola persoa titular da consellería competente en materia de Sanidade mediante resolución.

2. A presidencia corresponderalle á persoa titular da dirección xeral competente en materia de asistencia sanitaria do Servizo Galego de Saúde.

3. A vicepresidencia corresponderalle, á persoa titular da subdirección xeral competente en materia de planificación e programación asistencial do Servizo Galego de Saúde.

4. A secretaría corresponderalle a unha persoa proposta polo servizo competente en materia de saúde mental e asistencia a drogodependencias do Servizo Galego de Saúde.

5. As vogalías estarán formadas por:

- a) Unha persoa proposta pola Vicepresidencia e Consellería con competencia en materia de de presidencia, administracións públicas e xustiza.
- b) Unha persoa proposta pola Consellería con competencias en materia de Educación.
- c) Unha persoa proposta pola Consellería con competencias en materia de Política Social.
- d) Unha persoa proposta pola dirección xeral con competencias en materia de Saúde Pública da consellería competente en materia de sanidade.
- e) Unha persoa proposta polo Instituto de Medicina Legal de Galicia.
- f) Unha persoa proposta pola Fundación Pública Urgencias Sanitarias de Galicia-061.
- g) Unha persoa proposta pola Federación de Asociacións de Familiares e Persoas con Enfermidade Mental de Galicia (FEAFES Galicia)
- h) Un/ha enfermeiro/a especialista en saúde mental, en servizo activo, do Servizo Galego de Saúde, a proposta da dirección xeral competente en materia de asistencia sanitaria.
- i) Un/ha traballador/a social, en servizo activo, do Servizo Galego de Saúde, a proposta da dirección xeral competente en materia de asistencia sanitaria.
- l) Un/ha médico/a de medicina familiar e comunitaria, en servizo activo, do Servizo Galego de Saúde, a proposta da dirección xeral competente en materia de asistencia sanitaria.
- m) Un/ha psiquiatra, en servizo activo, do Servizo Galego de Saúde, a proposta da dirección xeral competente en materia de asistencia sanitaria.
- m) Un/ha psicólogo/a clínica, en servizo activo, do Servizo Galego de Saúde, a proposta da dirección xeral competente en materia de asistencia sanitaria.

6. En caso de vacante, ausencia, enfermidade ou outra causa xustificada os/as vogais serán substituídos/as polas persoas suplentes designadas polo órgano proponente. O/a secretario/a poderá ser substituído/a pola persoa suplente que se designe.

7. Na composición da Comisión Interdepartamental procurarase unha presenza equilibrada de mulleres e homes.

Artigo 5. Presidencia

Son funcións da presidencia da Comisión Interdepartamental:

- a) Desempeñar a representación da comisión.
- b) Acordar a convocatoria das sesións ordinarias e extraordinarias e a fixación da orde do día, tendo en conta, de ser o caso, as peticións dos demais membros formuladas coa suficiente antelación.
- c) Presidir as sesións, moderar o desenvolvemento dos debates e suspendelos por causas xustificadas.
- d) Dirimir co seu voto os empates, para os efectos de adoptar acordos.
- e) Asegurar o cumprimento das leis.
- f) Visar as actas e certificacións dos acordos da comisión.
- g) Exercer cantas outras funcións sexan inherentes á súa condición de presidente/a da comisión.

Artigo 6. Vicepresidencia

Correspóndelle á persoa que desempeña a vicepresidencia:

- a) Substituír a persoa que desempeña a presidencia na totalidade das súas atribucións, nos casos de vacante, ausencia, enfermidade ou outra causa xustificada.
- b) Exercer as funcións intrínsecas á súa condición de membro da Comisión, con dereito a voto.
- c) Cantas outras funcións expresamente lle sexan delegadas pola presidencia.
- d) Asistir á presidencia nas correspondentes sesións da comisión.

Artigo 7. Vogais

Ás persoas titulares das vogalías corresponderalles as seguintes funcións:

- a) Recibir, cunha antelación mínima de corenta e oito horas, a convocatoria que conteña a orde do día das reunións. A información sobre os temas que figuren na orde do día estará á disposición dos membros coa antelación referida.
- b) Participar nos debates das sesións.
- c) Exercer o seu dereito ao voto e formular o seu voto particular, así como expresar o sentido do seu voto e os motivos que o xustifican.

d) Non absterse nas votacións aquelas persoas que sexan membro pola súa calidade de autoridade ou persoal ao servizo das administracións públicas.

e) Formular rogos e preguntas.

f) Obter a información precisa para cumprir as funcións asignadas.

g) Cantas outras funcións sexan inherentes á súa condición.

Artigo 8. *Secretaría*

1. A persoa que exerza a secretaría da comisión terá as seguintes funcións:

a) Asistir ás reunións, con voz pero sen voto.

b) Efectuar a convocatoria das sesións da comisión por orde da súa presidencia, así como as citacións aos seus membros.

c) Recibir os actos de comunicación dos membros coa comisión e, polo tanto, as notificacións, peticións de datos, rectificacións ou calquera outra clase de escritos dos que deba ter coñecemento.

d) Preparar o despacho dos asuntos e redactar e autorizar as actas das sesións.

e) Expedir certificacións das consultas, ditames e acordos aprobados.

f) Coordinar as tarefas das subcomisións específicas que se poidan constituír.

g) Cantas outras funcións sexan inherentes á súa condición de secretario/a.

Artigo 9. *Funcionamento*

1. Para a válida constitución da comisión interdepartamental para os efectos da celebración de sesións, deliberacións e toma de acordos, requirirase a presenza da persoa que exerza a presidencia e da persoa que exerza a secretaría, ou das persoas que as substitúan, e da metade, polo menos, dos seus membros, presentes ou representados.

2. A comisión interdepartamental poderá reunirse empregando medios electrónicos para a súa constitución e adopción de acordos. A convocatoria e aprobación das actas poderá igualmente efectuarse por medios electrónicos sempre que se cumpran os requisitos previstos na Lei 16/2010, do 17 de decembro.

3. A comisión reunirase, con carácter ordinario, dúas veces ao ano e, con carácter extraordinario, cando sexa convocada pola persoa que exerza a secretaría, por acordo da persoa que exerza a presidencia.

4. Os acordos adoptaranse por maioría simple de votos. A persoa que exerza a presidencia, en caso de empate, terá voto de calidade.

5. Ademais dos seus membros, poderán asistir ás sesións, con voz pero sen voto, logo de convite da persoa que exerza a Presidencia, persoas de recoñecida competencia profesional ou representantes de entidades cuxa actividade teña relación cos asuntos que vaian tratarse, cando a natureza destes o requira.

Artigo 10. Duración do mandato dos membros da comisión e causas de cesamento

1. As persoas que posúan a condición de membro da comisión por razón do seu cargo perderán a dita condición cando cesen nel.

2. A composición da comisión renovarase como mínimo pola metade do seus membros cada catro anos. Una vez finalizado o seu mandato, permanecerán no desempeño das súas funcións ata o nomeamento dos novos membros.

3. O resto dos membros cesarán polas seguintes causas:

a) Incapacidade permanente, física ou mental, que inhabilite para o exercicio das funcións inherentes á condición de membro do órgano colexiado ou falecemento.

b) Perda das condicións que determinaron o seu nomeamento.

c) Renuncia.

d) Remoción por incumprimento grave das súas obrigas.

De se produciren algunha das causas relacionadas anteriormente, a nova persoa designada posuirá a condición de membro da comisión durante o tempo que reste ata o remate da duración do mandato.

4. Os servizos que presten os membros da comisión non xerarán dereitos laborais nin económicos para ningún deles.

Disposición adicional única. Gastos de funcionamento

As actuacións da Comisión Interdepartamental non xerarán incremento das consignacións orzamentarias da Consellería de Sanidade, nin do Servizo Galego de Saúde

Disposición derradeira primeira. *Desenvolvemento normativo*

Facúltase á persoa titular da consellería competente en materia de sanidade para adoptar cantas disposicións sexan necesarias para a aplicación deste decreto.

Disposición derradeira segunda. *Entrada en vigor*

Este decreto entrará en vigor o día seguinte ao da súa publicación no *Diario Oficial de Galicia*.

Santiago de Compostela, ... de ... de dous mil dezaioito

Alberto Núñez Feijóo

Presidente

Jesús Vázquez Almuiña

Conselleiro de Sanidade